




«Bürgerbräukeller» avant l'attentat...



... e suentar.

FOTOS MAD

# L'attentat da Johann Georg Elser sin Hitler avant 70 onns

DA JOHANN ULRICH SCHLEGEL

■ Avant 70 onns, ils 8 da november 1939, ha Johann Georg Elser commess en la brassaria «Bürgerbräukeller» a Minca tut sulet in attentat spectacular sin il dictatur tudestg. Gnanc tschintg onns avant l'enconuscent attentat da bumba entras il colonel Claus Schenk Graf von Stauffenberg ha il simpel giarsun scrinari da la Svevia, Johann Georg Elser, commess ils 8 da november 1939 tut sulet en la brassaria «Bürgerbräukeller» a Minca in attentat planisà minuziusamain sin Adolf Hitler.

Era sche la perscrutaziun contemporanea da l'istorgia ha cumprovà cleramain che tut las famas èn sbagliadas, las qualas pretendan che Elser haja commess in attentat simulà per incumbensa dal commando naziunalsocialistic, vegn sa regurdà oz en commemoraziuns annualas surtut da Stauffenberg e da ses gidanters curaschus.

Ma igl è segiramain er impurtant da sa regurda da l'act giagliard da quest cumbattant singul, Johann Georg Elser. Ad el fissi bunamain reussì da mazzar Hitler e da manar uschia l'istorgia da l'Europa en in'otra direcziun.

La fin da la vita da Johann Georg Elser è stada andetga e probablamain per el era dal tuttafatg sorprendenta. El ha vivì cun in tractament privilegià l'emprim en il champ da concentrasiun da Sachsenhausen, alura a Dachau en ina partiziun per praschuniers privilegiads sco il chancelier federal austriac Schuschnigg, il primminister franzos Léon Blum ed il colonel general Halder. En ina simbiosa curiosa cun quest inimi dal stadi naziunalsocialistic sperava il commando da pudair far cun Elser in

process sensaziunal, en emprima lingua cun tirafils britannics, per disfamar publicamain «la politica englaisa perfida che sa serva da metodos d'omicidi malignas». Ina cumplicitad n'han ins dentant mai pudì cumprovar. Quella n'hai mai dà. E cura che la sconfitta è s'avischinada, è Elser daventà inutil per il reschim. Paucs dis avant la liberaziun dal champ entras las truppas americanas – tenor la perscrutaziun contemporanea da l'istorgia probablamain ils 9 d'avrigl 1945 – è l'um da 42 onns vegnì liquidà «a moda discreta» sin cumond da las instanzas supremas.

## L'attentat da bumba en ina brassaria a Minca

Ils 8 da november 1939 a las 21.20 è la brassaria «Bürgerbräukeller» a Minca vegnida squassada d'ina enorma explosiun. Il pult da referir da Hitler, ina pitga davos quel e grondas parts dal palantschieu sura èn gist vegnids stgarpads en plirs tocs. Set persunas èn vegnidaz mazzadas e 63 per part blessadas grevamain. Var diesch minutas avant la detunaziun aveva Hitler bandunà il pult e la sala – passa ina mes'ura pli baud che previs oriundamain en ses program.

## L'arrestaziun

Johann Georg Elser è vegnì traplà ed arrestà anc la medema notg, plitost per casualità e curt avant che passar il cunfin svizzer a Kreuzlingen. Ils duaniers al avevan tschiffà pensond ch'el veglia mitschar dal servetsch militar. Cura che la novitad da l'attentat a Minca è alura sa derasada, è era l'arrestà vegnì examinà pli minuziusamain. Utensils da Minca e da la «Hofbräukellerei», sco ina carta postala, han manà ad ina chadaina d'indizis



Johann Georg Elser.

adina pli clera che ha la finala identifitgà l'attentader.

## Mais a la lunga ha Elser preparà l'attentat en la brassaria a Minca

Plirs mais ha Elser, in mastergnant talentà e zambregiader instancabel, duvrà per integrar la bumba cronometrada en la pitga davos il pult da referir. Per pudair far quella lavur tant fanatica sco era cumpletamain secreta aveva Elser sa laschà serrar la notg en la brassaria. Dals pli differents manaschis aveva el rimnà ensemen ils utensils technics necessaris. Da numerus mastergnants esters, tschernids libramain dad el, aveva el retratg il

material da construcziun ch'el duvrava. Uschia saveva la fin mo el sulet per tge intent che tut questa rauba serviva.

## Ils motivs

Malgrà las abilitads artisanalas e tecnicas excellentas na disponiva Elser betg d'ina furmaziun particulara. Sco quai ch'ins po concluder dals protocols da consultaziun na legeva el nagins cudeschs e mo darar la gasetta. El n'era ni influenzà ideologicamain ni engaschà politicamain.

Senza avair studegià ed approvà ideologicamain il program ha el votà il 1933 per la Partida communistica tudestga: El

ha vulì exprimer uschia sia solidaritad cun ils lavurants e meglierar lur sort. Sut Hitler ha el dentant vis a sa sviluppar ina malcontentientscha tranter ils lavurants, ina nunlibertad ed ina politica ch'è pronta da manar guerra per cuntanscher sias finamiras. Dapi la Crisa dals Sudets il 1938 è sa manifestada en Elser l'idea fissa d'eliminar il commando suprem per evitar ina guerra; quella è la finala rutta or otg emnas avant, anc durant sias preparaziuns per l'attentat sin Hitler.

## Il caracter e la muntada dad Elser

Durant in entir onn ha Elser drizzà tut sia atenziun ed energia sin la preparaziun da l'act criminal, sumegliant al cronometer da sia bumba, minuta per minuta, fin la destrucziun da sias unfrendas e da sasez. Ed el ha er anc prendì en cumpra il mazzament d'auters umans, da persunas innocentas. Sia finamira era dentant d'impedir che anc bler dapli persunas vegnian per la vita. Contemporans, era ses adversaris, na considereschan el betg sco criminal usità. Il «Völkischer Beobachter» ha scrit ils 22 da november 1939: «Quest um n'ha betg ina fisognomia da criminal exprimida, mabain egl's intelligents, expressiuns bufatgas, precautas, las consultaziuns s'estendan ad infinitum: Mintga pled ponderescha el ditg a la lunga e precisamain.»

Sumegliant a la ducrina da la predestinaziun ha il protestant Elser la finala constatà sin las dumondas da ses derschaders inquisiturs che ses plan fiss reussì sch'el avess gi raschun; cunquai ch'il plan na saja dentant betg reussì, stoppia era sia opiniun esser stada fallada.

Sche Elser avess mazzà Hitler, fissi reussì a personalitads civilas e militaras pli moderadas da sa far valair meglier envers ses successur.